

Cu presencia di SAR Princes Margriet

Museo Arqueologico Nacional Aruba a habri oficialmente

Publico grandi a presencia e acto historic aki



ORANJESTAD- Diadomingo dia 26 di Juli Museo Arqueologico Nacional Aruba a habri su portanan oficial den un ambiente cu hopi energia positivo. Un multitud di hende a bin Schelpstraat 42 pa tambe forma parti di e acto historico aki.

SAR Princes Margriet y Professor Pieter van Vollenhoven conhunto a haci e acto oficial di apertura, cual tabata algo unico y nunca antes visto na Aruba.

Incorpora den e pre-show bou direccion di sr. Takhai

Mohamed a trece un potchi pa dilanti pa sr. Francisco Croes, empleado cu mas añanan den servicio di Museo.

Sr. Fransisco Croes a presenta e potchi pa Profesor Pieter van Vollenhoven cual a saca un remote control for di e potchi y na su turno a presenta esaki na su casa, SAR Princes Margriet, cu a primi e boton di e remote control.

Na e momento ey, manera un solo, e logo nobo di MANA a sali den laira, riba e edificionan historico, iluminando tur esnan presente, simbolicamente



mostrando un comienzo nobo pa e Museo.

E evento nacional a encera un show spectacular cu a ser prepara pa organisacionan di Aruba, Antiyas y Hulanda. E 'stage' di e actonan oficial y e show tabata forma door di e plein na Schelpstraat na cual strategicamente a pone tribunesnan hisa na l'aira, pa asina crea e ambiente di un semi-'arena'. E 'decor' di e stage tabata e edificionan historico di Museo

Arqueologico Nacional Aruba y Monumentenbureau.

Algun invitado selecta a haya e privilegio pa ser invita pa un receptie apart cu SAR Princes Margriet y Profesor Pieter van Vollenhoven, mientras otro invitadonan a disfruta di e exposicion permanente y temporario. anochi ameno a clausura cu presentacion di e bandanan Datapanic, Youth Extreme y Dj Intifada cu a percura pa un ambiente masha festivo.

Museo Arqueologico Nacional Aruba ta gradici henter pueblo di Aruba pa su participacion y sosten na e proyecto aki, muy en particular na tur persona y organisacion cu a forma parti di e trabaonan di preparacion, cu na un of otro manera a colabora pa e apertura oficial di MANA por a bira un exito! Riba e potretnan adhunto por aprecia algun momento durante e anochi festivo, cultural y entretenido di e apertura di MANA.

